

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Kumin January thla atanga July thla inkar khan Mizoram chuan ruahtui a dawng tha a, district hrang hrang zingah Kolasib chuan ruahtui hi dawng tha ber.
- 2. Tourism Minister Pu Lalnghinglova Hmar chuan khualzin hip turin, Mizoram district hrang hranga hmun pawimawh behchhana thawnthu sawi hmanga inelna buatsaih chu a tangkai ngei a beisei thu a sawi.
- 3. Lirthei hmanga eizawng pawl hrang hrang inzawmkhawm te chuan, kawng chhia vanga tunkar chhung tlan chawlh an puan chu nimin tlai dar 4 khan khar.
- 4. Prime Minister Narendra Modi chuan Kashmir Valley-a bungraw phur rel hmasa ber a thleng chu a fak.

<><><>

RAINFALL

Kumin January thla atanga July thla inkar khan Mizoram chuan ruahtui a dawng tha a, district hrang hrang zingah Kolasib chuan ruahtui hi dawng tha berin, tun hnai thla sarih chhung hian ruahtui 1758.6mm a dawng a ni.

Akashvani Aizawl zawhna chhangin Indian Meterological Department, Aizawl Director Pu Sudheer Kumar Dwivedi chuan, Kolasib dawtah hian Aizawl leh Siaha district te chuan ruah tui an dawng the zual zawk niin a sawi a, nikum aiin ruahtui an dawng tha zawk a ni. Khaw awm dan thlir chuan August leh September thlaah hian ruahtui a la tlak belh nual turah an ngai bawk.

(Byte: Pu Sudheer Kumar Dwivedi)

Hetih lai hian Champhai leh Mamit District te erawh chuan nikum nena khaikhin chuan ruahtui hi an dawng tha tawk lo deuh thung a ni. Mizoram hian ruah tui a dawng tha thin a, chutihrualin lei min leh chhiatna dang pawh a thlen phah ve thin bawk a ni.

Pu Sudheer Kumar Dwivedi chuan ruahtui tlak chungchang leh khaw chin mipui hnena puan chhuah chungchangah All India Radio chuan mawhphurhna pawimawh tak a la nia sawiin, mipui himna leh thu pawimawh tak tak hriattirtu a ni tih a sawi bawk.

<><><>

TOURISM MINISTER

Tourism Minister Pu Lalnghinglova Hmar chuan khualzin hip turin, Mizoram district hrang hranga hmun pawimawh behchhana thawnthu sawi hmanga inelna buatsaih chu a tangkai ngei a beisei thu a sawi.

Tourism Department bultuma Mizoram district hrang hranga June thla atanga lo kalpui tawh, thawnthu sawi hmanga inelna ‘Narrating Mizoram: A Tales of Our Land – Storytelling Competition’ hmawrbawkna chu tun hnai khan neih a ni a, Ignite Studio, Khatlaa hun hman niin, Pu Lalnghinglova Hmar chuan, ram, hnam leh hmunhma chanchinte ngaihnawn taka midang hnen a an sawi thiam chuan a ngaithlatute thinlungah a taka hmuh ve chakna a tuh a, chu chu Mizorama Tourism tih hmasawna kawngah thil pawimawh tak a nih thu a sawi a. Mizoram hmun hrang hrang thawnthu sawia inelna buatsaihna hian zin mite hipna kawng ah hmasawna a thlen ngei a beisei thu a sawi bawk a ni.

‘Narrating Mizoram: A Tales of Our Land – Storytelling Competition’ hmawrbawkna ah hian lawmman 1-na chu Serchhip District-in lain lawmpuina thuziak leh pawisa fai Rs.50 000/- an dawng a, 2-na chu Saitual District niin Rs. 30,000/- an dawng a, 3-na lawmman chu Khawzawl District-in lain Cheng Rs. 20,000/- an dawng a ni.

<><><>

ROAD

Lirthei hmanga eizawng pawl hrang hrang inzawmkhawm te chuan, kawng chhia vanga tlan chawlh an puan chu nimin tlai dar 4 khan an ti tawp a, Mizo mipui ten tha taka an thlawp avangin lawmthu an sawi.

Lirthei tlan chawlh an neih chhung hian Mizoram chak lakluhna kawng chhe zualpui lai chu siam a ni a, siam zawh vek la ni chiah lo mah se sorkar thu chhuah tarlan dan chuan a chhe zualpui lai thawm that a ni tawh a, lirthei an tlang pangngai leh thei dawn hnai tawh a ni.

Mizoram chakkhai lakluhna kawngpui a chhiat avangin sumdawng hrang hrang ten bungraw lakluh kawngah harsatna an nei a, bungrua a thlen that loh avangin mipui ten an tuar mek bawk a ni.

Akashvani Aizawl zawhna chhangin Bawnghnute chikhat Verka Distributor Pu F. Lalrodinga chuan bawnghnute zawrh tur an neih loh avangin chawlhkar hnih chhung chu dawr pawh an hawng mumal tawh lo niin a sawi a. Bawnghnute chu bungraw dang nen a inang lo tih sawiin, kalkawnga rei tak thangpui chi a nih loh bakah, a chhiat phah chuan a phurtu lamin an tuar thin a, hei vang hian state pawn atangin a rawn lut tha thei rih lo tih a sawi bawk.

Aizawl Zarkawta awm Bylane Restaurant neitu Pu J. Malsawmtluanga pawhin kum dangah chuan kawng chhia tuar ve tin mah se, kumin ang em e a tawrh nasat an neih loh thu a sawi a, bungraw lakluh a harsat avangin harsatna an tawk tih a sawi bawk a ni.

(Byte: Pu J. Malsawmtluanga)

Ei leh in chauh ni loin insakna bungrua leh in satu te pawhin kawng chhia hi an tuar mek. Lushai Corner neitu Pu Robert Lalthanmawia chuan, Mizoramah bungrua a lo lut muangin kal kawngah hun an hman rei thin avangin bungraw phurh man a to phah niin a sawi a, bungraw thenkhat lo thleng awm mah se a thlen kim theih mai thin loh avangin insak chungchangah harsatna an tawk tih a sawi.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Wawiin chawhnu dar 2 leh a chanve-ah Chanchinthar puan leh a ni ang.

<><><>

ZORO

Zo Re-unification Organisation (ZORO) Vice President Pu L. Ramdinlana Renthlei chuan, Khawvelah ram leilung fate hnam lian leh chak zawkte'n an hneh lak avanga an awp beh tak hnam chi peng 5,000 lai mai an awm a, ram 90-ah inzar pharhin mihring maktaduai 370 zet an tling a ti a, Mizote pawh chu'ng zinga hnam pakhat an ni niin a sawi.

Nimin kha World Indigenous Day a ni a, hemi ni pual hian ZORO Vice President Pu L. Ramdinlana Renthlei chuan Zo hnahtlak zawng zawngte World Indigenous Peoples' Day chibai a buk a, Zofate hnam anga inpumkhatna leh din chhuahna a nih theih nan Zofa unau zawng zawngte duhsakna a hlan a ni.

Akashvani Aizawl in a kawmnaah Pu L. Ramdinlana chuan, Khawvel sawrkar intel khawm pawl, UN chuan ram leilung fate hi awpbettute laka an tal chhuah theihna tur leh an pianpui dikna leh chanvote an neih let theih nan kum 2007 September ni 13 khan, ‘UN Declaration on the Rights of Indigenous Peoples’ puangin, a theih chen chenah mahniah ro inrel tura thuneihna pek a rawt a, he

declaration hnuaiah hian Zofate pawhin tharum hmang lova mahnia ro inrel a, hnam a nih hun tur nghakhlel takin an thlir mek a ni a ti.

Zoro Vice President chuan Zofate chu ram hrang hrangah then darh an la nih rih avangin hnam anga an inpumkhat a, inpeizawn a, intuamhlawm tawn hi tun dinhmuna an thlen chin a ni rih a, hemi kawngah hian an ti tha thawkhat viau nain, hmasawnna tur an la ngah hle a ni, a ti.

Kum 1988 May ni 20-ah Zofate insuih khawmna tura hma latu pawl, Zo Re-unification Organisation (ZORO) din niin, May ni 21, 2004-ah Zofa zawng zawng ai awhin UNO-ah Affiliated NGO member-ah khung a ni.

<><><>

Freight Train

Prime Minister Narendra Modi chuan Kashmir Valley-a bungraw phur rel hmasa ber a thleng chu a fak hle a, national freight network nena inzawm tir kawngah a hlu hle a ti a ni.

Union Minister for Railways Ashwini Vaishnaw-a’n social media-a a post chhangin Prime Minister chuan Jammu and Kashmir-a sumdawnna leh inbiakpawhna atana ni ropui tak a nih thu sawiin, hmasawnna leh hausakna a tipung dawn a ni, a ti a.

Union Minister Vaishnaw a post-ah chuan ,nimin khan Punjab atangin Kashmir Valley-a Anantnag a Goods Shed commission thar, bungraw phur rel hmasa ber a thleng tih a sawiin, Railway network hmanga inkalpawhna chuan Kashmir valley-a cheng mipuite tan senso a tihtlem phah dawn a ni, a ti a.A tlan hmasak berin darkar 18 hnua lam chhungin kilometre 600 vel a tlan a, cement wagon 21 a phur a ni. He train hmang hian tunah chuan Kashmir Valley chu Indian Railways freight corridor-ah a inzawm kim tawh a, hei hian he bial atanga bungraw phurh chhuah leh haw theihna tur a siamsak a ni.

<><><>